

列臣答曰不知其由當入而問之入問于金協協以手歷指巨濟等官
列錄處曰類皆如此無煩故不錄以是答之臣出語之允峻更問曰
取稟事耶臣答曰非取稟而自院為之此固指色承旨矣但不序言耳
傳于憲府曰承旨等事前日同副承旨答臺官曰自院為之似若院中
共議事故請皆罷職矣今聞金瑛所啓之言則如是不必罷職而推之
也以瑛所啓之餘皆不見○傳曰親拜光陵則行茶禮于奉先殿也
○甲寅 御朝講特進官李思鈞曰今者數適守令故民有惡其守令
則必以事告訐而傾陷守令亦必畏民而不得設施此弊不祛則自下
達上必皆相傾陷矣 上曰果以民傾其守令此弊甚大此言至當矣
○臺諫啓前事皆不見○夜艮方巽方坤方有氣如火○乙卯都承旨
金希壽左副承旨俞汝霖同副承旨金瑛啓曰聞金協答推考公緘曰
院中同議此似院中有相推調至為未安輦轂之下安有如此之事乎
頃刻不可在職前日傳教以為本院雖被駁毋得退去專數被駁則當
如是也今則承旨一員有不察者不可在此而上達也但啓在職未安
之意而已傳曰當初臺官問時同副承旨不議于他承旨只聞金協言
而答之以此見之協之不同議于院中可知也金協若實不同議而乃